

四庫全書

集部

欽定四庫全書

集部

御定全唐詩卷十八

三至

詳校官庶吉士臣胡鉦

主事銜臣徐以坤覆勘

總校官知縣臣繆琪

校對官編修臣嚴福

謄錄監生臣陳瞻燧

欽定四庫全書

御定全唐詩卷十三

郊廟歌辭

享太廟樂章

唐書樂志曰貞觀中享太廟樂迎神用永和九變詞同皇帝行用太

和登歌酌匱用肅和迎組用雍和獻皇祖宣簡公皇祖懿王同用長發之舞景皇帝用大基之

舞元皇帝用大成之舞高祖用大明之舞皇帝飲福用壽和送文舞出迎武舞入用舒和武舞

用凱安撤組用雍和送神用永和其太和凱安詞同冬至園丘並魏徵褚亮等作

永和

於穆烈祖弘此丕基永言配命子孫保之百神既洽萬國在茲是用孝享神其格思

肅和

大哉至德允茲明聖格于上下聿遵誠敬嘉樂斯登鳴球以詠神其降止式隆景命

雍和

崇茲享祀誠敬兼至樂以感靈禮以昭事粢盛咸絜牲牷孔備永言孝思庶幾不匱

長發舞

唐會要曰貞觀十四年詔用顏師古
許敬宗議皇祖宣簡公懿王廟並奏

長發之舞取詩云
指維商長發其祥也

濬哲維唐長發其祥帝命斯祐王業克昌配天載德就
日重光本支百代申錫無疆

大基舞

猗與祖業皇矣帝先翦商德厚封唐慶延在姬猶稷方
晉踰宣基我鼎運於萬斯年

大成舞

周稱王季晉美帝文明明盛德穆穆齊芬藏用四履屈
道三分鏗鏘鍾石載紀鴻勳

大明舞

唐會要曰貞觀十四年詔用顏師古等議高祖廟奏大明之舞取易曰大

明終始六位時成詩有大明之篇稱文王有明德也

五紀更運三正遞升勛華既沒禹湯勃興神武命代靈
睠是膺望雲彰德察緯告徵上紐天維下安地軸徵師
涿野萬國咸服偃伯靈臺九官允穆殊域委賚懷生介
福大禮既飾大樂已和黑章擾圉赤宇浮河功宣載籍

德被詠歌克昌厥後百祿是荷

壽和

八音斯奏三獻畢陳寶祚惟永暉光日新

舒和

聖敬通神光七廟靈心薦祚和萬方嚴禋克配鴻基遠
明德惟馨鳳曆昌

雍和

於穆清廟聿修嚴祀四懸載陳三獻斯止籩豆徹薦人

祇介祉神維格思錫祚不已

永和

肅肅清祀烝烝孝思薦享昭備虔恭在茲雍歌徹俎祝
嘏陳辭用光武志永固鴻基

享太廟樂章

唐書樂志曰高宗永徽已後續造享太廟樂章獻太宗用崇德之舞

高宗用鈞天之舞中宗用太和之舞睿宗用景雲之舞皇祖宣皇帝用光大之舞舊樂章宣元二宮同用長發其詞亦同開元十年始別造詞而宣帝更用光大云

崇德舞

五運改卜千齡啟聖彤雲曉聚黃星夜映葉闡珠囊基

開

後為圖開

玉鏡下臨萬寓上齊七政霧開三象塵清九服

海濂星暉遠安邇肅天地交泰華夷輯睦翔泳歸仁中
外禔福績踰黜夏勲高翦商武陳七德刑設三章祥禽
巢閣仁獸遊梁卜年惟永景福無疆

鈞天樂

承天撫籙纂聖登皇遐清萬寓仰協三光功成日用道
濟時康璇圖載永寶曆斯昌日月揚暉煙雲爛色河嶽

修貢神祇効職舜風攸偃堯曦先就睿感通靈孝思浹
宙奉揚先德虔遵曩狩展義天扃飛英雲岫化逸王表
神凝帝先乘雲厭俗馭日登玄

太和舞

廣樂既備嘉薦既新述先惟德孝饗惟親七獻具舉五
齊畢陳錫茲祚福於萬斯春

景雲舞

惟睿作聖惟聖登皇精感耀魄時膺會昌舜慙大孝堯

推讓王能事斯極振古誰方文明履運車書同軌巍巍
赫赫盡善盡美衢室凝旒大庭端宸釋負之寄事光復
子脫屣高天登遐上玄龍湖超忽象野芊綿遊衣複道
薦果初年新廟奕奕明德配天

光大舞

大業龍祉徽音駿尊潛居皇德赫嗣天昆展儀宗祖重
誠孝孫春秋無極享奏存存

享太廟樂章

唐書樂志曰太樂舊有享太廟迎
神次金奏及送神詞三章不詳所

起

迎神

七廟觀德百靈攸仰俗荷財成物資含養道光執契化
籠提象肅肅雍雍神其來饗

金奏

肅肅清廟巍巍盛唐配天立極累聖重光樂和管磬禮
備烝嘗永惟來格降福無疆

送神

五聲備奏三獻終祠車移鳳輦旆轉虹旗禮周邊豆誠效虔祇皇靈徙蹕簪紳拜辭

武后享清廟樂章十首

第一

建清廟贊玄功擇吉日展禋宗樂已變禮方崇望神駕降仙宮

第二

隆周創業寶命惟新敬宗茂典爰表虔禋聲明已備文

物斯陳肅容如在懇志方申

第三登歌

肅敷大禮上謁尊靈敬申筐幣載表丹誠

第四迎神

敬奠蘋藻式罄虔襟潔誠斯展佇降靈歆

第五飲福

爰陳玉醴式奠瓊漿靈心有穆介福無疆

第六送文舞

帝圖草創皇業初開功高佐命業贊雲雷

第七迎武舞

赫赫玄功被穹壤皇皇至德洽生靈開基撥亂妖氛廓
佐命宣威海內清

第八武舞作

荷恩承顧託執契恭臨撫廟畧靜邊荒天兵耀神武

第九徹俎

登歌已闋獻禮方周欽承景福肅奉鴻休

第十送神

大禮言畢仙衛將歸莫申丹懇空瞻紫微

享太廟樂章

唐書樂志曰中宗神龍元年享太廟樂迎神用嚴和九變詞同皇帝

行用升和登歌裸鬯用虔和迎俎用歆和光皇帝酌獻用長發景皇帝酌獻用大基元皇帝酌獻用大成高祖酌獻用大明太宗酌獻用崇德五室舞詞並同貞觀高宗酌獻用鈞天舞詞同光宅孝敬皇帝酌獻用承光皇帝飲福用延和送文舞出迎武舞入用同和武舞用寧和撤俎用恭和送神用通和皇后助享皇后行用正和詞同貞觀中宮朝會登歌奠鬯用昭和皇后酌獻飲福用誠敬撤俎用肅和送神用昭感

嚴和

肅肅清廟赫赫玄猷功高萬古化奄十洲中興丕業上
荷天休祇奉先構禮備懷柔

昇和

顧惟菲薄纂厯應期中外同軌夷狄來思樂用崇德禮
以陳詞夕惕若厲欽奉弘基

虔和

禮標薦望肅事祠庭敬申如在敢託非馨

歆和

崇禋已備，棗盛聿修。潔誠斯展，鍾石方邁。

承光舞

金相載穆，玉裕重輝。養德清禁，承光紫微。乾宮候色，震象增威。監國方永，賓天不歸。孝友自衷，溫文性與。龍樓正啟，鶴駕斯舉。丹宸流念，鴻名式序。中興考室，永陳彝俎。

延和

巍巍累聖穆穆重光奄有區夏祚啟隆唐百蠻飲澤萬國來王本枝億載鼎祚逾長

同和

惟聖配天敷盛禮惟天為大闡洪名恭裡展敬光先德蘋藻申虔表志誠

寧和

炎馭失天一作王網土德承天命英猷被寰宇懿躅隆邦

政七德已綏邊九夷咸底定景化覃遐邇深仁洽翔泳

恭和

禮周三獻樂闋九成肅承靈福悚惕無盈

通和

祠容既畢仙座爰興停停鳳舉霽霽雲升長隆寶運永
錫休徵福覃貽厥恩被黎蒸

昭和

道洽二儀交泰時休四寓和平環珮肅於庭實鍾石揚
乎頌聲

誠敬

顧惟非質忝位椒宮虔奉蘋藻肅事神宗敢申誠絜庶
罄深衷睟容有裕靈享無窮

肅和

月禮已周雲和將變爰獻其醑載遷其奠明德逾隆非
馨是薦澤霑動植仁覃寓縣

昭感

鏗鏘韶濩肅穆神容洪規赫赫祠典雍雍已周三獻將

乘六龍虔誠有託懇志無從

享太廟樂章

唐書樂志曰明皇開元七年享太廟樂迎神用永和皇帝行用太和

登歌酌瓚用肅和迎俎用雍和皇帝酌醴齊用文舞獻宣皇帝用光大舞先皇帝用長發舞景

皇帝用大政舞元皇帝用大成舞高祖用大明舞太宗用崇德舞高宗用鈞天舞中宗用大和

舞睿宗用景雲舞皇帝飲福受脤用福和送文舞出迎武舞入用舒和亞獻終獻行事武舞用

凱安撤豆用登歌送神用永和按景皇帝舊用大基至是改用大政云樂章並特進行尚書左

丞相燕國公張說撰

永和三章

肅九室諧八音歌皇慕動神心禮宿設樂妙尋聲明備
裸奠臨

律迓氣音入玄依玉几御黼筵聆愾息優周旋九韶遍
百福傳

信工祝永頌聲來祖考聽和平相百辟貢九瀛神休委
帝孝成

太和

時文聖后清廟肅邕致誠勤薦在貌思恭玉節肆夏金

鐙五鍾繩繩雲步穆穆天容

肅和

天子享孝工歌溥將躬裸鬱鬯乃焚膋薌臭以達陰聲
以求陽奉時烝嘗永代不忘

雍和二章

在滌嘉泰麗碑敬牲角握之壯色純之騂火傳陽燧水
漑陰精太公胖俎傳說和羹

俎豆有馥粢盛絜豐亦有和羹既戒既平鼓鐘管磬肅

唱和鳴皇皇后祖來我思成

文舞

聖謩九德真言五千慶集昌胤符開帝先高文杖鉞克
配彼天三宗握鏡六合渙然帝其承祀率禮罔愆圖書
霧出日月清懸舞形德類詠諡功傳黃龍蜿蜒彩雲蹕
躔五行氣順八佾風宣介此百祿於皇萬年

光大舞

肅肅藝祖滔滔濬源有雄玉劒作鎮金門玄王貽緒后

稷謀孫肇裡九廟四海來尊

長發舞

具禮崇德備樂承風魏推幢主周贈司空不行而至無
成有終神興王業天歸帝功

大政舞

於赫元命權輿帝文天齊八柱地半三分宗廟觀德笙
鏞樂勲封唐之兆成天下君

大成舞

帝舞

一作符

季歷龍

一作襲

聖生昌后歌有嶠胎炎孕黃天

地合德日月齊光肅雖孝享祚我萬方

大明舞

赤精亂德四海困窮黃旗舉義三靈會同早望春雨雲
披大風溥天來祭高祖之功

崇德舞

皇合一德朝宗百神削平天地大拯生人上帝配食單
于入臣戎歌陳舞睦睦震震

鈞天舞

高皇邁道端拱無為化懷獫鬻兵賦一作戢句驪禮尊封

禪樂盛來儀合位媯后同稱伏羲

大和舞

退居江水鬱起丹陵禮物還舊朝章中興龍圖友及駿
命恭膺鳴球香瓊大韃是承

景雲舞

景雲霏爛告我帝符噫帝冲德與天為徒笙鏞遙遠俎

豆虛無春秋孝獻迴復此都

福和

備禮用樂崇親致尊誠通慈降敬徹愛存獻懷稱壽
感承恩皇帝孝德子孫千億大包天域長亘不極

舒和

六鍾翕協六變成八佾徜徉八風生樂九韶兮人神感
美七德兮天地清

凱安四章

瑟彼瑤爵亞惟上公室如屏氣門不容躬禮殷其本樂
執其中聖皇永慕天地幽通

禮匝三獻樂遍九成降循軒陛仰欽皇情福與仁合德
因孝明百年福位四海風行

總總千戚填填鼓鐘奮揚增氣坐作為容離若鷺鳥合
如戰龍萬方觀德肅肅雖雖

烈祖順三靈文宗威四海黃鉞誅羣盜朱旗掃多罪哉
兵天下安約法人心改大哉干羽意常見風雲在

登歌

止笙磬撤豆邊廓無響窅入玄主在室神在天情餘慕
禮罔愆喜黍稷屢豐年

永和

眇嘉樂授靈爽感若來思如往休氣散迴風上返寂寞
還惚恍懷靈駕結空想

享太廟樂章

唐書樂志曰代宗寶應已後續造享太廟樂章獻明皇用廣運之舞

肅宗用惟新之舞代宗用保大之舞德宗用文明之舞順宗用大順之舞憲宗用象德之舞穆

宗用和寧之舞武宗用大定之舞昭宗用成寧之舞宣宗懿宗有舞詞而不傳

廣運舞

司徒中書令汾陽王郭子儀撰

於赫皇祖昭明有融惟文之德惟武之功河海靜謐車書混同虔恭孝饗穆穆玄風

惟新舞

吏部尚書平章事彭城郡公劉晏撰

漢祚惟永神功中興風驅氛祲天覆黎蒸三光再朗庶績其凝重熙累洽景命是膺

保大舞

尚父郭子儀撰

於穆文考聖神昭章肅

一作肅

勺

一作清

羣慝含光遠方萬

物茂遂九夷賓王惜惜雲韶德音不忘

文明舞

尚書左丞平章事鄭餘慶撰

開邸除暴時邁勛尊三元告命四極駿奔金枝翠葉輝
燭瑤琨象德億載貽慶湯孫

大順舞

中書侍郎平章事鄭絪撰

於穆時文受天明命允恭玄默化成理定出震嗣德應
乾傳聖猗歟緝熙千億流慶

象德舞

中書侍郎平章事段文昌撰

肅肅清廟登顯至德澤周八荒兵定四極生物咸遂羣盜滅息明聖欽承子孫千億

和寧舞

中書侍郎平章事牛僧孺撰

湜湜頤頤融昭德輝不紐不舒貫成九圍武烈文經敷施當宜纂堯付啟億萬熙熙

大定舞

門下侍郎平章事李回撰

受天明命敷佑下土化時以儉衛文以武氛消夷夏俗

臻往古億萬斯年形于律呂

宣宗室舞

門下侍郎
夏侯孜撰

於鑠令主聖祚重昌興起教義申明典章俗尚素朴人
皆樂康積德可報流慶無疆

懿宗室舞

中書侍郎平
章事蕭倣撰

聖祚無疆慶傳樂章金枝繁茂玉葉延長海瀆常宴波
濤不揚汪汪美化垂範今王

咸寧

一作
舞

不詳
作者

於鑠丕嗣惟帝之光羽籥象德金石薦祥聖系無極景
命永昌神降上哲惟天配長

御定全唐詩卷十三

欽定四庫全書

御定全唐詩卷十四

郊廟歌辭

太清宮樂章

唐書禮儀志曰明皇開元二十年正月詔兩京諸州置玄元廟天寶

二年三月以西京玄元廟為太清宮其樂章降仙聖奏煌煌登歌發爐奏冲和上香畢奏紫極舞撤醺奏登歌送仙聖奏真和會要曰太清宮薦獻聖祖玄元皇帝奏混成紫極之舞

煌煌

煌煌道宮肅肅太清禮光尊祖樂備克庭罄竭誠至希

夷降靈雲凝翠蓋風燄紅旌衆真以從九奏初迎永惟
休祐是錫和平

冲和

虛無結思鐘磬和音歌以頌德香以達心禮殊裸鬯義
感昭臨雲車至止慶垂惜惜

香初上

肅肅我祖緜緜道宗至感潛達靈心暗通雲輶御氣芝
蓋隨風四時裡祀萬國來同

再上

仙宗績

一作積

道我李承天慶深虛極符光象先俗登仁

壽化闡壇涓五千貽範億萬斯年

終上

不宰元功無為上聖洪源長發誕受天命金奏迎真璇
宮展盛備禮周樂垂光儲慶

紫極舞

至道生元氣重圓法混成無為觀大象冲用體常名仙

樂臨丹闕雲車出玉京靈符百代應瑞節九貞迎寶運
開皇極天臨映太清長垂一德慶永庇萬方寧

序入破第一奏

真宗開妙理冲教統清虛化演無為日言昭有象初瑤
臺肅靈瑞金闕映仙居一奏三清樂長回八景輿

第二奏

虛極仙宗本希夷象帝先百靈朝太上萬法祖重圓善
貸惟冲德功成謂自然雲門達和氣思用合鈞天

第三奏

元符傳紫極寶祚啟高真道德先垂裕冲和已化淳人
風齊太古天瑞叶惟新仙樂清都上長明交泰辰

登歌

嚴裡展事禮潔烝嘗皇矣聖祖德惟馨香盛薦既撤工
歌載揚大來之慶降福穰穰

真和

玉磬含香金爐既馥風馭泠泠雲壇肅肅杳歸大象霈

流嘉福俾寧萬邦無思不服

德明興聖廟樂章

唐書禮儀志曰明皇天寶二年三月追尊臯繇為德明皇

帝涼武昭王為興聖皇帝其廟樂第一迎神第二登歌奠幣第三迎俎第四酌獻第五亞獻終

獻第六送神樂章並

吏部侍郎李舒撰

迎神

元尊九德佐堯光宅烈祖太宗方周作伯響懷霜露樂
變金石白雲清風髣髴來格

登歌奠幣

四時有典百事來祭尊祖奉宗嚴裡大帝禮先蒼壁奠
幣黜制於斯萬年熙成帝系

迎俎

盛牲實俎涓選休成鼎燬陽燧玉盥陰精有飮嘉豆既
和大羹侑以清樂細齊人情

德明酌獻

清廟奕奕和樂雍雍器尊犧象禮屬宗公白水方裸黃
流在中謨明之德萬古清風

興聖酌獻

闕宮靜謐合樂周張泰尊始獻百末重觴震澹存誠庶
幾迪嘗遙源之祚天漢靈長

亞獻終獻

惟清惟肅靡聞靡見舉備九成俛終三獻慶彰曼壽昨
徹嘉薦瘞玉埋牲禮神斯徧

送神

元精回復靈貺繁滋風灑蘭路雲搖桂旗高丘緬邈涼

部逶遲瞻望靡及纏綿永思

儀坤廟樂章

唐書樂志曰儀坤廟樂迎神用永和次金奏皇帝行用太和酌獻登

歌用肅和迎俎用雍和肅明皇后室酌獻用昭升昭成皇后室酌獻用坤貞飲福用壽和送文舞出迎武舞入用舒和武舞用安和撤俎用雍和送神用永和

永和

散騎常侍昭文館學士徐彥伯作

猗若清廟肅肅熒熒國薦嚴祀坤興淑靈有儿在室有樂在庭臨茲孝享百祿惟寧

金奏

不詳作者一本無此章

陰靈効祉軒曜降精祥符淑氣慶集柔明瑤俎既列雕
桐發聲徽猷永遠比德皇英

太和

左諭德昭文館
學士丘說作

孝哉我后冲乎迺聖道映重華德輝文命慕深視篋情
殷撫鏡萬國移風兆人承慶

肅和

太子洗馬昭文館
學士張齊賢作

裸圭既濯鬱鬯既陳畫幕雲舉黃流玉醇儀克獻酌禮
盛衆裡地察惟孝愉焉饗親

雍和 大中大夫昭文館學士鄭善玉作

酌鬱既灌薌蕭方蕝籩豆靜器

一作嘉

簋簋芬飮魚腊薦

美牲牲表潔是戢是將載迎載列

昭升

禮部尚書昭文館學士薛稷作

陽靈配德陰魄昭升堯壇鳳下漢室龍興
倪天作對前旒是凝化行南國道盛西陵
造舟集濯無德而稱我粢既絜我醴既澄
陰陰靈廟光靈若憑德馨惟享孝思烝
烝

坤貞

不詳作者

乾道既亨坤元以貞肅雍攸在輔佐斯成外睦九族內
光一庭克生睿哲祚我休明欽若徽範悠哉淑靈建茲
清宮于彼上京縮茅以獻絜秬惟馨實受其福期乎一作
斯億齡

壽和

太子詹事崇文館學士徐堅作

於穆清廟肅雍嚴祀合福受釐介以繁祉

舒和

銀青光祿大夫崇文館學士胡雄作

送文迎武逋參差一始一終光聖儀四海生人歌有慶
千齡孝享肅無虧

安和

祕書少監崇文館
學士劉子玄作

妙算申帷幄神謀出廟庭兩階文物備七德武功成校
獵長楊苑屯軍細柳營將軍獻凱入歌舞溢重城

雍和

銀青光祿大夫崇文
館學士員半千作

孝享云畢惟徹有章雲感玄羽風悽素商瞻望神座祇
戀匪遑禮終樂闋肅雍鏘鏘

永和金紫光祿大夫崇文館學士祝欽明作

闕宮實實清廟微微降格無象馨香有依式昭纂慶方

融嗣徽明裡是享神保聿歸

儀坤廟樂章

唐書樂志曰太樂又有儀坤廟樂章與前畧同而有迎神送神二章

無徐彥伯祝欽明之詞

迎神

月靈降德坤元授光娥英比秀姪姒均芳瑤臺薦祉金屋延祥迎神有樂歆此嘉禋

送神

玉帛儀大金絲奏廣靈應有孚冥徵不爽降彼休福歆
茲禋享送樂有章神麾其上

昭德皇后廟樂章

唐書樂志曰昭德皇后廟迎神用永和登歌酌匏用肅和

迎組用雍和酌獻用坤元飲福用壽和送文舞
出迎武舞入用舒和武舞用凱安撤組用雍和

送神用永和
其詞內出

永和

穆清廟薦嚴禋昭禮備和樂新望靈光集元辰祚無極

享萬春

肅和

誠心達娛樂分升蕭管鬱氛氤茅既縮鬯既薰后来思
福如雲

雍和

我將我享盡明而誠載芬黍稷載滌犧牲懿矣元良萬
邦以貞心乎愛敬若覩容聲

坤元

於穆先后，膺聖稱崇。母臨萬宇，道備六宮。昌時協慶，理內成功。殷薦明德，傳芳國風。

壽和

工祝致告，徽音不遐。酒醴咸旨，馨香具嘉。受釐獻祉，永慶邦家。

舒和

金枝羽部，徹清歌瑤臺。肅穆笙磬羅諧，音遍響合明意。萬類昭融，靈應多。

凱安

辰位列四星帝功參十亂進賢勤內輔扈蹕清多難承
天厚載均並耀宵光燦留徽藹前躅萬古披圖煥

雍和

公尸既起享禮載終稱歌進徹盡敬繇衷澤流惠下大
小咸同

永和

昭事終幽享餘移月御返仙居璇庭寂靈幄虛顧裴回

感皇儲

御定全唐詩卷十四

欽定四庫全書

御定全唐詩卷十五

郊廟歌辭

讓皇帝廟樂章

吏部侍郎
李舒撰

迎神

皇矣天宗德先王季因心則友克讓以位爰命有司式
遵前志神其降靈昭饗祀事

奠幣

惟帝時若去而上仙祀用商舞樂備宮懸白壁加薦玄
纁告虔子孫拜後承茲吉蠲

迎俎

祀盛體薦禮協粢盛方周假廟用魯純牲捧徹祗敬擊
拊和鳴受釐歸胙既戒而平

酌獻

八音具舉三壽既盟潔茲宗粢瑟彼圭瓚蘭肴重錯椒
醑飄散降胙維城永為藩翰

亞獻終獻

秩禮有序和音既同九儀不忒三揖將終孝感藩后相維辟公四時之典永永無窮

送神

奠獻已事昏昕載分風搖雨散靈衛罔緼龍駕帝服上騰五雲泮宮復闕寂寞無聞

享隱太子廟樂章

唐書樂志曰貞觀中享隱太子廟樂迎神用誠和登歌奠

玉帛用肅和迎俎用雍和送文舞出迎武舞入用舒和武舞用凱安送神用誠和詞同迎神

誠和

道闕鶴關運，纏鳩里門集。大命俾歆嘉，祀禮亞六瑚。誠殫二簋有，誠顯若神斯。戾止。

肅和

歲肇春宗乾，開震長瑤山。旣寂戾園斯，享玉肅其事物。昭其象，弦誦成風。笙歌合響。

雍和

明典肅陳，神居邃啓。春伯聯事，秋官相禮。有來雍雍，登。

歌濟濟緬維主鬯庶歆芳醴

舒和

三縣已判歌鐘列六佾將開羽鉞分尚想燕飛來蔽日
終疑鶴影降凌雲

凱安

天步昔將開商郊初欲踐撫戎金陣廓貳極瑤圖闡雞
戟遂崇儀龍樓期好善弄兵隳震業啓聖隆嗣典

隱太子廟樂章

唐書樂志曰太樂舊有隱太子廟迎送神辭二章不詳所起

迎神

蒼震有位黃離蔽明江克禍結戾據災成銜冤昔痛贈
典今榮享靈有秩奉樂以迎

送神

皇情悼往祀議增設鐘鼓鏗鏘羽旄昭晰掌禮云備司
筵告徹樂以送神靈其鑒闕

享章懷太子廟樂章

唐書樂志曰神龍初享章懷太子廟樂章第一迎神

第二登歌酌鬯第三迎俎及酌獻第四送文舞
出迎武舞入第五武舞作第六送神詞同隱廟

迎神

副君昭象道應黃離銅樓備德玉裕成規仙氣靄靄靈
從師師前驅戾止控鶴來儀

登歌酌鬯

忠孝本著羽翼先成寢門昭德馳道為程幣帛有典容
衛無聲司存既肅廟享惟清

迎俎酌獻

通三錫胤明兩承英太山比赫伊水聞笙宗祧是寄禮

樂其亨嘉辰薦俎以發聲明

送文舞迎武舞

羽籥崇文禮以畢干鉞奮武事將行用含繇來其有致
壯志宣威樂太平

武舞作

綠林熾炎歷黃虞格有苗沙塵驚塞外帷幄命嫖姚七
德干戈止三邊雲霧消寶祚長無極歌舞盛今朝

享懿德太子廟樂章

唐書樂志曰神龍初享懿德太子廟樂章第一迎神

第二登歌酌鬯第三迎俎及酌獻第四送文舞
出迎武舞入第五武舞作第六送神詞同隱廟

迎神

甲觀昭祥畫堂升位禮絕羣后望尊儲貳啟誦懋德莊
丕掩粹伊浦鳳翔緱峰鶴至

登歌酌鬯

譽闡元儲寄崇明兩玉裕雖晦銅樓可想弦誦輟音笙
歌罷響幣帛言設禮容無爽

迎俎酌獻

雍雍盛典肅肅靈祠
賔天有聖對日無期
飄飄羽服掣曳雲旗
眷言主宅心乎愴茲

送文舞迎武舞

八音協奏陳金石
六佾分行整禮容
滄溟赴海還稱少
素月開輪即是重

武舞作

隋季昔云終唐年初
啟聖纂戎將禁暴
崇儒更敷政威略
靜三邊仁恩覃萬姓

享節愍太子廟樂章

唐書樂志曰景雲中享節愍太子廟樂章第一迎神

第二登歌酌鬯第三迎俎及酌獻第四送文舞出迎武舞入第五武舞作第六送神詞同隱廟

迎神

儲后望崇元良寄切寢門是仰馳道不絕仙袂雲會靈
旗電晰煌煌而來禮物攸設

登歌酌鬯

灼灼重明仰承元首既賢且哲惟孝與友惟孝雖遙靈

規不朽禮

一作祀

因誠致備絜玄酒

迎俎酌獻

嘉薦有典至誠莫愆畫梁雲亘雕俎星連樂器周列禮容備宣依稀如在若未賓天

送文舞出迎武舞入

邕邕闡化憑文德赫赫宣威藉武功既執羽旄先拂吹還持玉鉞更揮空

武舞作

武德諒雍雍由來掃寇戎劒光揮作電旗影列成虹霧

廓三邊靜波澄四海同睿圖今已盛相共舞皇風

享文敬太子廟樂章

請神

許孟容作

觴牢具品管磬有節祝道夤恭神儀昭晰桐圭早貴象輅追設聲達樂成降歆豐潔

登歌

陳京作

歌以德發聲以樂貴樂善名存追仙禮異鸞旌拱修鳳鳴合吹神聽皇慈仲月皆至

迎俎酌獻

馮伉作

撰日瞻景誠陳樂張禮容秩秩羽舞煌煌肅將滌濯祇
薦芬芳永錫繁祉思深饗嘗

送文舞迎武舞

不詳作者

干旄羽籥相虧蔽一進一退殊行綴昔獻三雍盛禮容
今陳六佾崇儀制

亞獻終獻

崔邠作

醴齊泛尊曩軒縣動干戚入室優如在升階虔所歷奮

疾合威容定利舒
皦繹方崇廟貌禮
永被君恩錫

送神

張薦作

三獻具舉九旗將旋
追勞表德罷享賓天
風引仙管堂虛畫筵
芳馨常在瞻望悠然

享惠昭太子廟樂章

請神

歸登作

嘉薦既陳祀事孔明
間歌在堂萬舞在庭
外則盡物內則盡誠
鳳笙如聞歆其潔精

登歌

杜羔作

因心克孝位震遺芬賓天道茂軫懷氣分發祇乃祀咳
歎如聞二歌斯升以詠德薰

迎俎酌獻

李逢吉作

既潔酒醴聿陳熟腥肅將震念昭格儲靈展矣禮典薰
然德馨愔愔管磬亦具是聽

送文舞出迎武舞入

孟簡作

喧喧金石容既缺肅肅羽駕就行列緱山遺響昔所聞

廟庭進旅今攸設

亞獻終獻

裴度作

重輪始發祥齒胃方興學冥然升紫府鏗爾薦清樂奠
聿致馨香在庭紛羽籥禮成神既醉髣髴緱山鶴

送神

王涯作

威儀畢陳備樂將闋芑茅酒縮管蕭香徹宮臣展事肅
雍在列迎精送往厥鑒昭晰

武后崇先廟樂章

載本集

先德謙撝冠昔嚴規節素超今奉國忠誠每竭承家至
孝純深追崇懼乖尊意顯號恐玷徽音既迫王公屢請
方乃俯遂羣心有限無由展敬奠醑每闕親斟大禮虔
申典冊蘋藻敬薦翹襟

褒德廟樂章

唐書樂志曰神龍中中宗為皇后
韋氏祖考立廟曰褒德其廟樂迎

神用昭德登歌用進德俎入初獻用褒德
次武舞作亞獻及送神用彰德詞並內出

昭德

道赫梧宮悲盈蒿里爰賜徽烈載敷嘉祀享洽四時規

陳二簋靈應昭格神其戾止

進德

塗山懿戚媯汭崇姻祠筵肇啟祭典方申禮以備物樂
以感神用隆敦叙載穆彛倫

褒德

家著累仁門昭積善瑶筐既列金縣式展

武舞作

昭昭竹殿開奕奕蘭宮啟懿範隆丹掖殊榮闢朱邸六

侑薦徽容三簋陳芳醴萬石覃貽厥分珪崇祖禰

彰德

名隆五嶽秩映三台嚴祠已備睟影方迴

舞曲歌辭

功成慶善樂舞詞

一曰九功舞殿庭朝會所奏文舞也新唐禮樂志曰太宗

生於武功之慶善宮貞觀六年幸之宴從臣賞賜閭里同漢沛宛帝歡甚賦詩呂才被之管絃名曰功成慶善樂以童兒六十四人冠進德冠紫袴褶長襖漆髻屣履而舞舊書樂志曰慶善樂太宗所造也名九功之舞舞蹈安徐以象文德洽而天下安樂也冬正享讌及國有大慶與

七德舞偕
奏於庭

壽丘惟舊跡鄴邑乃前基
粵余承累聖懸弧亦在茲
弱齡逢運改提劒鬱匡時
指麾八荒定懷柔萬國夷
梯山盛入款駕海亦來思
單于陪武帳日逐衛文棬
端宸朝四岳無為任百司
霜節明秋景輕冰結水湄
芸黃遍原隰禾穎積京坻
共樂還譙宴歡比大風詩

中和樂舞詞

唐會要曰貞元十四年德宗以中和節自製中和舞舞中成八卦又

叙其舞曰朕以中春之首紀為令節象中和之容作中和之舞按此曲蓋因繼天誕聖樂而作

也

芳歲肇佳節物華當仲春乾坤既昭泰煙景含氤氲德
淺荷玄貺樂成思治人前庭列鐘鼓廣殿延羣臣八卦
隨舞意五音轉曲新顧非咸池奏庶協南風薰式宴禮
所重浹歡情必均同和諒在茲萬國希可親

凱樂歌辭

唐書樂志曰唐制凡命將出征有大功獻俘馘其凱樂用饒吹二部樂器

有笛篳篥簫笳饒鼓歌七種迭奏破陣樂等四曲一破陣樂二應聖期三賀聖歡四君臣同慶樂初太宗平東都破宋金剛其後蘇定方執賀魯李勣平高麗皆備軍容凱歌以入而貞觀顯

慶開元禮並無儀注太常舊有破陣樂應聖期
兩曲歌詞至太和三年始具儀注又補撰二曲
為四
曲云

破陣樂

受律辭元首相將討叛臣
咸歌破陣樂共賞太平人

應聖期

聖德期昌運雍熙萬寓清
乾坤資化育海嶽共休明
闡土欣耕稼銷戈遂偃兵
殊方歌帝澤執贄賀昇平

賀聖歡

四海皇風被千年德永清戎衣更不著今日告功成

君臣同慶樂

主聖開昌歷臣忠奉大猷君看偃草後便是太平秋

御定全唐詩卷十五

欽定四庫全書

御定全唐詩卷十六

郊廟歌辭

梁郊祀樂章

五代會要曰梁開平二年正月太常奏定郊廟樂曲南郊降神奏慶

和之樂舞崇德之舞皇帝行奏慶順奠玉幣登歌奏慶平迎組奏慶肅酌獻奏慶熙飲福酒奏慶隆送文舞迎武舞奏慶融亞獻終獻奏慶休送神奏慶和

慶和

趙光逢撰辭

就陽位升圓丘佩雙玉御大裘膺天命擁神休萬靈感

百祿道

秉黃鉞建朱旗震八表清二儀帝業顯王道夷受景命
啟皇基

開九門懷百神通肸鬯接氤氲明粲薦廣樂陳稟嘉璧
燎芳薪

膺寶圖執左契德應天聖饗帝薦表衷荷靈惠壽萬年
祚百世

惟德動天有感必通秉茲一德禋於六宗欽寅寶命恭

肅禮容來顧來享永穆皇風

天惟佑德辟乃奉天交感斯在昭事罔愆歲功已就王道無偏於焉報本是用告虔

慶順

聖皇戾止天步舒遲乾乾睿相穆穆皇儀進退必肅陟降是祗六變克協萬靈協隨

慶平

天命降鑒帝德惟馨享祀不忒禮容孔明奠璧布幣薦

神獻精神祐以答敷錫永寧

慶肅

張袞撰辭

遵豆簠簋黍稷非馨懿茲彝器厥德惟明金石匏草以

和以平繇此無體

一作疆

期乎永寧

慶熙

哲后躬享旨酒斯陳王恭無斃嚴祀維夤皇祖以配大
孝以振宜錫景福永休下民

慶隆

恭祀上帝于國之陽爵醴是荷鴻基永昌

慶融

道和氣兮襲氤氲宣皇規兮彰聖神服遐裔兮敷質文
格苗扈兮息煙塵

慶休

大業來四夷仁風和萬國白日體無私皇天輔有德七
旬罪已服六月師方克偉哉帝道隆終始常作則

慶和

煙燎升禮容徹誠感達人神悅靈貺彰聖情結玉座寂

金爐歌

周郊祀樂章

五代史樂志曰太祖廣順元年邊蔚議改漢十二成為十二順之樂

祭天神奏昭順之樂祭地祇奏寧順之樂祭宗廟奏肅順之樂登歌奠玉帛奏感順之樂皇帝行及臨軒奏治順之樂王公出入送文舞迎武舞奏忠順之樂皇帝食舉奏康順之樂皇帝受朝皇后入宮奏雍順之樂皇太子軒懸出入奏溫順之樂正至皇帝禮會登歌奏禮順之樂郊廟俎入奏禋順之樂酌獻飲福奏福順之樂祭孔宣父齊太公降神同用禮順之樂三公升降及行同用忠順之樂享藉田同用寧順之樂

昭順樂

五兵勿用萬國咸安告功圓蓋受命雲壇樂鳴鳳律禮
備雞竿神光欲降衆目遐觀

治順樂

羽衛離丹闕金軒赴泰壇珠旗明月色玉珮曉霜寒黼
黻龍衣備琮璜寶器完百神將受職宗社保長安

感順樂

明君陳大禮展幣祀圓丘雅樂聲齊發祥雲色正浮

禋順樂

黃彝將獻特牲預迎既修昭事潛達明誠

福順樂

相承五運取法三才大禮爰展率土咸來卿雲秘室甘泉寶臺象樽初酌受福不回

福順樂

昊天成命邦國盛儀多士齊列六龍載馳壇升泰一樂奏咸池高明祚德永致昌期

福順樂

上天垂景貺
指后舉鸞觴
明德今方祚
邦家萬世昌

忠順樂

木鐸敷音文
德昌朱干成
列武功彰雷
鼓鸞羽今休用

玉鉞相叅正
發揚

武舞樂

圭瓚方陳禮
干旄乃象功
成文非羽籥
猛勢若羆熊

昭順樂

雲門孤竹蒼璧黃琮既祀天地克配祖宗虔修盛禮仰
答玄功神歸碧落福降無窮

梁太廟樂舞辭

五代會要曰梁開平二年正月太常奏定享太廟樂迎神舞開

平之舞迎俎奏慶肅之樂酌獻奏慶熙飲福酒
奏慶隆送文舞迎武舞奏慶融亞獻終獻奏慶
休唐餘錄曰梁宗廟樂迎神奏開平舞次皇帝
行次帝盥次登歌獻肅祖奏大合之舞恭祖奏
象功之舞憲祖奏來儀之舞烈祖奏
昭德之舞次飲福次撤豆次送神

開平舞

黍稷馨醴醕清牲牷潔金石鏗恭祀事結皇情神來格

歌頌聲

皇帝行

莫高者天攀躋弗克濟天有方累仁積德祖宗隆之子
孫履之配天明祀永永孝思

帝盥

莊肅泣事周旋禮容裸鬯嚴潔穆穆雍雍

登歌

於赫我皇建中立極動以武功靜以文德昭事上帝歡

心萬國大報嚴裡四海述職

大合舞

於穆皇祖濬哲雍熙美溢中夏化被南陲后稷累德公
劉創基肇興九廟樂合來儀

象功舞

天地合德睿聖昭彰累贈太傅俄登魏王雄名不朽奕
葉而光建國之兆君臨萬方

來儀舞

於赫帝命應天順人亭育品彙賓禮一作穆百神洪基永

固景命惟新肅恭孝享祚我生民

昭德舞

肅肅文考源濬派長漢稱誕季周實生昌奄有四海超
彼百王笙鏞迭奏禮物煒煌

飲福

戛玉掞金永頌聲縈絲孤竹和且清靈歆醉止犧象盈
自天降福千萬齡

撒豆

笙鏞洋洋庭燎煌煌明星有爛祝史下堂籩豆斯撤禮容有章克勤克儉無怠無荒

送神

其降無從其往無蹤黍稷非馨有感必通赫奕令德髣髴睟容再拜慌忽遐想昊穹

後唐宗廟樂舞辭

唐餘錄曰後唐並用唐樂無所變更惟別造六室舞辭懿

祖室奏昭德之舞獻祖室奏永平之舞莊宗室奏武奏應天之舞昭宗室奏永平之舞莊宗室奏武

成之舞明宗室
奏雍熙之舞

昭德舞

懿彼明德赫赫煌煌名高閭域功著旂常道符休泰運
叶祺祥慶傳萬祀以播耿光

文明舞

帝業光揚皇圖翕赫聖德孔彰神功不測信及豚魚恩
霑動植懿範鴻名傳之萬億

應天舞

晉國肇興雄圖再固黼黻帝道金玉王度皇天無親惟德是輔載誕英明永光聖祚

永平舞

慶傳瓚祚位正瑤圖功宣四海化被八區靜彰帝道動合乾符千秋萬祀永荷昭蘇

武成舞

崔居儉
撰詞

艱難王業返正皇唐先天再造却日重光漢紹世祖夏資少康功成德茂率祀無疆

雍熙舞

盧文紀撰詞

仁君御宇寰海謚清運符武德道協文明九功式叙百

度惟貞金門積慶玉葉傳榮

漢宗廟樂舞辭

五代史樂志曰漢宗廟酌獻樂舞文祖室奏靈長之舞德祖室

奏積善之舞翼祖室奏顯仁之舞唐餘錄曰高祖追
慶之舞高祖室奏觀德之舞唐餘錄曰高祖追
尊四祖廟且遠引漢之二祖為六室張昭因傳
會其禮乃曰太祖高皇帝創業垂統室奏武德
之舞世祖光武皇帝再造丕基室奏大武之
舞自如其舊而大武即用東平王蒼詞云

武德舞

明明我祖天集休明神母夜哭彤雲晝興遵豆有踐管
籥斯登孝孫致告神其降靈

靈長舞

天降祥漢祚昌火炎上水靈長建廟社潔蒸嘗羅鐘石
儼珩璜陳玉豆酌金觴氣昭感德馨香祇洛汭瞻晉陽
降吾祖福穰穰

積善舞

黍稷斯馨祖德惟明蛇告赤帝龜謀大橫雲行雨施天

成地平造我家邦
幹我璿衡陶匏在
御醴盎惟精或憂
或擊載炮載烹飲
福受昨舞降歌迎
滔滔不竭洪惟水
行

顯仁舞

運極金行謝天資
水德隆禮神廊時
館布政未央宮詒
旦修明祀登歌荅
茂功雲軒臨降久
星俎薦陳豐霽霽
沈檀霧鏘鏘環佩
風熒煌升藻藉肸
鬩轉珠櫳尊祖成
韶備貽孫書軌同
京坻長有積宗社
享無窮

章慶舞

呆恩曉唱雞人三牲八簋斯陳霧集瑤階瑣闥香生綺
席華茵珠佩貂璫熠燿羽旄干戚紛綸酌鬯既終三獻
凝旒何止千春阿閣長棲綵鳳郊宮疊奏祥麟赤伏英
靈未泯玄圭運祚重新玉笋犧樽漱盥龍旂鳳轄逡巡
瞻望月遊冠冕猶疑蒼野回輪

觀德舞

張昭撰辭

高廟明靈再啟圖金根玉輅幸神都巢阿丹鳳銜書命

入昴飛星獻寶符正換薰絃娛赤子忽登仙駕泣蒼梧
薦櫻鶴館茹簫咽酌鬯金楹劒佩趨星俎雲壘兼魯禮
朱干象箭雜巴渝氤氲龍麝交青瑣髣髴錫鑾下紫珠
薦豆奉觴親玉几配天合祖耀璿樞受釐飲酒皇歡洽
仰俟餘靈泰九區

周宗廟樂舞辭

唐餘錄曰周宗廟樂降神奏肅
順皇帝行奏治順獻信祖室奏

肅雍之舞倍祖室奏觀成之舞太祖室奏明德
之舞世宗室奏定功之舞酌獻登歌奏感順迎
祖奏裡順飲福奏福順送文舞迎武舞奏忠
順武舞奏善順撤祖奏禮順送神奏肅順

肅順

我后至孝祗謁祖先仰瞻廟貌夙設宮懸朱絃疏越羽
舞廻旋神其來格明祀維虔

治順

清廟將入袞服是依載行載止令色令儀永終就養空
極孝思瞻望如在顧復長違

肅雍舞

周道載興象日之明萬邦咸慶百穀用成於穆聖祖祗

薦鴻名祀於廟社陳其犧牲進旅退旅皇武之形一倡
三歎朱絃之聲以妥以侑既和且平至誠潛達介福攸
寧

章德舞

清廟新展嚴裡恭祖德厚人倫雅樂薦禮器陳儼皇尸
列虞賓神如在聲不聞享必信貌維寅想龍服奠犧樽
禮既備慶來臻

善慶舞

卜世長帝祚昌定中國服四方修明祀從舊章奏激楚
轉清商羅俎豆列簪裳歌壘壘容皇皇望來格降休祥
祝敢告壽無疆

觀成舞

穆穆王國

一作皇圖

奕奕神功祀載展明德有融爨樽斯

滿簋簋斯豐紛紆旄

一作旌

羽鏘洋磬鐘或升或降克和

克同孔惠之禮必肅之容錫以純嘏祚其允恭神保是

饗萬世無窮

明德舞

惟彼岐陽德大流光載造周室澤及遐荒於鑠聖祖上
帝是皇廼聖廼神知微知彰新廟奕奕豐年穰穰取彼
血脣以往蒸嘗黍稷惟馨籩豆大房工祝致告受福無
疆

咸順

萬舞咸列三階克清貫珠一倡擊石九成盈觴雖酌靈
坐無形永懷我祖達其孝誠

裡順

旨酒既獻嘉穀乃迎振其鼗鼓潔以鉶羹肇裡肇祀或
炮或烹皇尸儼若保饗是明

福順

新廟奕奕金奏洋洋享於祖考循彼典章清酤特滿嘉
玉騰光神醉既告帝社無疆

忠順

稱文既表溫柔德示武須成蹈厲容綴兆疾舒皆應節

明明我祖樂無窮

善勝舞

五代史樂志曰周廣順元年改郊廟朝會舞名乃改漢治安為政和之舞

振德為善勝之舞觀象為崇德之舞講功為象成之舞

聖祖累功福鍾來裔持羽執干舞文不廢

禋順

禮畢祀先香散几筵罷舞干戚收撤豆籩

肅順

樂奏四順福受萬年神歸碧天庭餘瑞煙

晉朝饗樂章

五代會要曰晉天福四年十二月太常奏正至王公上壽皇帝舉酒

奏玄同之樂皇帝三飲皆奏文同之樂食舉奏昭德之舞次奏成功之舞皇帝降坐奏大同之樂其辭並崔祐等造唐餘錄曰天福五年十一月冬至朝羣臣舉觴奏玄同三爵登歌奏文同四爵登歌作羣臣飲宮懸樂作又奏龜茲及霓裳法曲以須食畢於時衆開龜茲法曲雅鄭雜繇固已非之明年正旦上壽登歌發聲悲離煩慙如虞殞薤露之音觀者以為不祥

初舉酒文同樂

赫矣昌運明哉聖王文興隆典禮復舊章駕鸞濟濟鳥獸蹌蹌一人有慶萬福無疆

舉酒

大明御宇至德動天君臣慶會禮樂昭宣
劒佩成列金石在縣椒觴再獻寶曆萬年

再舉酒

朝野無事寰瀛大康聖人有作盛禮重光
萬國執玉千官奉觴南山永固地久天長

四舉酒

八表歡無事三秋賀有成
照臨同日遠渥澤並雲行河

變千年色山呼萬歲聲願修封岱禮方以稱文明

羣臣酒行歌

劒佩儼如林齊傾拱北心渥恩頒美祿咸獲聽和音一
德君臣合重瞳日月臨歌時兼樂聖唯待贊泥金

萬國咸歸禹千官共祝堯拜恩瞻鳳宸傾耳聽雲韶運
啟金行遠時和玉燭調酒酣齊拊舞同賀聖明朝

令節陳高會羣臣侍御筵玉墀留愛景金殿靄祥煙振
鷺涵天澤靈禽下樂懸聖明無一事何處讓堯年

周朝饗樂章

唐餘錄曰周元正冬至朝饗樂公卿入奏忠順皇帝坐奏治順羣臣

上壽奏福順皇帝舉壽酒登歌奏康順羣臣降階公卿出並奏忠順

忠順

歲迎更始節及朝元冕旒仰止冠劍相連八音合奏萬物齊宣常陳盛禮願永千年

忠順

明君當宁列辟奉觴雲容表瑞日影初長衣冠濟濟鐘磬洋洋令儀克盛嘉會有章

治順

庭陳大樂坐當太微凝旒負宸端拱垂衣駕鸞成列簪
組相輝御爐香散郁郁霏霏

福順

聖皇端拱多士輸忠蠻觴共獻臣心畢同聲齊嵩嶽祝
比華封千齡萬祀常保時雍

康順

鴻鈞廣運嘉節良辰列辟在位萬國來賓千旌屢舞金

石咸陳禮容既備帝履長春

忠順

禮成三爵樂畢九成共離金祀復列彤庭

忠順

明庭展禮為龍為光咸韶息韻駕鸞歸行

晉昭德成功舞歌

唐餘錄曰晉天福五年詔有司復修正至朝會二舞之制

以文舞為昭德之舞武舞為成功之舞十一月冬至遂奏之於時二舞久廢東喜於復興而樂工舞員雜取教坊以滿之聲節靡曼綴兆合節而無遠但遲速之累及明年正旦再奏聲容蹈

屬進退無列議者非之五代史樂志曰文舞六
十四人左手執籥右手執翟冠進賢冠服黃紗
袍白紗中單皂領襖白練襪襠白布大口袴草
帶烏皮履白布襪武舞六十四人左手執干右
手執戚服弁平巾幘金支緋絲布大袖緋絲布
襠襠甲金飾白練襪襠錦騰蛇起梁帶豹文大
口布袴
烏皮靴

昭德舞歌二首

聖代修文德明庭舉舊章兩階陳羽籥萬舞合宮商
佩森鴛鴦簫韶下鳳凰我朝青史上千古有輝光

淮海干戈戢朝廷禮樂施白駒皆就繫丹鳳復來儀德

備三苗格風行萬國隨小臣同百獸率舞賀昌期

武功舞歌二首

撥亂資英主開基自晉陽一戎成大業七德煥前王炎
漢提封遠姬周世祚長朱干將玉戚全象武功揚

睿算超前古神功格上圓百川留禹跡萬國戴堯天既
已橐弓矢誠宜播管絃蹒蹒隨鳥獸共樂太平年

御定全唐詩卷十六